

# CONCLOTTA

Official mensual organ del OCCIDENTAL-UNION

Redaction e Administration: INSTITUTE OCCIDENTAL, CHAPELLE (Vd), Svissia



COMITÉ  
DE  
REDACTION:

Prof. E. de WAHL  
(Estonia)

Dr Bertil BLOMÉ  
(Svedia)

Prof. J. PODOBSKY  
(Tchecosl.)

Dr H. NIDECKER  
(Svissia)

Nr. 121  
Serie A  
MAI  
1938





Desde pluri seculs mult homes provat crear un auxiliari lingue facil e neutral. Li unes basat it principalmen sur li **naturalità** e negliget li regularità (exemples : *Mundolingue* de Lott, *Latino sine flexione* de Peano, etc.). Li altres basat it principalmen sur li **regularità** (exemples : *Esperanto*, *Ido*), e pro to ne hesitat mutilar li international paroles.

Ma, por esser adoptet de omni popules e de omni classes del population, un international lingue deve esser ne solmen regulari, **ma anc presentar un aspect natural** in su radicas e in su derivates. It deve esser fundat sur li **principie del maximum de internationalità** e retrovar li international paroles per su propri regules de derivation.

Li solution de ti problema ha esset tro desfacil pour omni autores de international lingues. Solmen pos 30 annus de provas e experienties, li baltic erudit Edgar de Wahl **successat combinar li naturalità e li regularità**, e formular un systema permissent formar per quelc regules li international derivates.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es **li max facil lingue por li majorité del popules**.

Occidental es diffuset per li **OCCIDENTAL-UNION** quel es neutral in religion e in politica, e per li national societés de propaganda. Li Occidental-Union es directet de un **SENAT**, e del **CENTRAL OFFICIE** durant que li **ACADEMIE** decide pri li linguistic formes.

Li **Institute Occidental in Chapelle (Vaud), SVISSIA**, responde immediatmen e gratuitmen a omni demandes de information concernent Occidental, su scope, su grammatica e su vocabularium, e corresponde in francés, german, anglés, italian, hispan, Esperanto, Ido, Occidental.



Pro quo li nomine de  
"Occidental"?

### CURT GRAMMATICA DE OCCIDENTAL

**Infinitives** : Finale **-r**. Ex. : *fini-r, ama-r, deve-r*.

**Adjectives** : Finale inobligatori **-i**. Ex. : *micri*.

**Adverbs** : Finale **-men**. Ex. : *visibil-men, regulari-men*.

**Present del verbes** : li radica sol. Ex. *tu fini, tu ama, tu deve*.

**Passate** : Finale **-t**. Ex. : *tu fini-t, il ama-t, noi deve-t*.

**Passate composit** : per auxiliare **ha-r**. Ex. : *tu ha finit, noi ha videt*.

**Future** : auxiliare **va**. Ex. : *Tu va finir, il va amar, etc.*

**Conditionale** : auxiliare **vell**. Ex. : *tu vell finir, yo vell prender*.

**Imperative** : **ples**, o li radica sol. Ex. : *Ples finir ! Fini !*

**Participie present** : **-nt**. **Participie passat** : **-t**. **Gerundive** : **-nte**.

**Masculin** : **-o**. **Feminin** : **-a**. **Plurale** : **-(e)s**.

Un sol articul definit : **li**. Adjectives invariabil.

**Pronomines personal** : *Yo, tu, il, illa, it* ; plurale : *Noi, vu, ili*.

**Attention ! Por li abbonates de Cosmoglotta :**



## COSMOGLOTTA

**CONTENE :** **LINGUE :** **A. Matejka :** Facilitá del Lingue International. — **DISCUSSION :** **Erik Stenberg :** Esque Couturat o de Beaufront? — Esperanto quam Lingue International Auxiliari — Ex altri campos (*Scorpion*) — Noi e I.A.L.A. — Li revelationes del scriptura. **FILATELIE :** Li bell series comemorativ. — **LITERATURA :** **Goethe :** Li rey del alnes. — **Arvid Balk :** Li voce del continentes — **CRONICA.**

## LINGUE

## FACILITA DEL LINGUE INTERNATIONAL

de A. Matejka

Li mimeografat revue : *Rug\**a Esperantisto publica in su numeró 69 (Feb. 1938) li secuent declaration de un nederlandés camarad quel hat studiat Esperanto solmen desde curt tempor :

« Mi estis de plano fari malgrandan elpas\*eton kun mia amiko al via lando. Ni antauprenis al ni foriri la dekan de agosto. Sed bedaùrinde gi ne iris tra. La edzino de mia amiko ne volis ke li kuniris, kun la okulo sur la granda eldono. Tamen mi ne volis surdoni la planon : mi venis sur la ideon ke estus plej bona iri sola. Sur aliaj homoj oni neniam povas sur al. Kaj mi foriris. La longa vojug\*o tre falis kun, kaj mi estas tre g\*oja esti tie ci. Cetero, c\*iu vokas pri mia bona Esperanto. »<sup>1</sup>

Ti pezze es sublim, etsi su bellitás revela se in lor tot splendore solmen a conossores del lingue hollandés.

Pro quo yo cita it? Simplicmen pro que it ilustra in maniere eloquent un del divers aspectes del problema pri li grand « facilitá de un L. I. On save que li assertion pri li grand facilitá del mundlingue es li cardinal argument del propagatores de Espo. Ma li abyss inter teorie e practica es tant profund que li rasonabil Esperantistes comensa vider li dangere (ples vider li articul in COSMOGLOTTA B 16) e exfortia frenar li ardore del propagatores.

Li exemple supra citat confirma plenmen li modern teories pri li lingual instruction, secun queles ne li paroles, ma li frases es li ver unités linguistic. On mey remarcar que li textu del esperantist hollandés

<sup>1</sup> Por dar nor letores ne comprendent Esperanto un impression del textu, noi traducte it ci tam litteralmen ex Esperanto quam it ha esset redactet secun li idiotismes hollandés :

« Yo esset de plane far un litt expassuette con mi amico a vor land. Noi anteprendet nos forear ye li decesim de august. Ma regretabilmen it ne eat tra. Li marita de mi amico ne volet que il eat con me, con li ocul sur li grand exdation. Tamen yo ne volet sur-dar li plan : yo venit sur li idé que it vell esser max bon ear sol. Sur altri homes on nequande posse sur al. E yo foreat. Li long viage tre cadet con, e yo es tre joyosi esser ci. Céteri, omnes aclama pri mi bon Esperanto. »

Un liber traduction secun li sens vell dar : « Yo intentet far un litt excursion con mi amico a vor land. Noi projectet forear ye li decesim de august. Ma regretabilmen it ne esset possibil. Li marita de mi amico ne volet que il accompaniat me, pro li grand expense. Tamen yo ne volet abandonar li plan. Yo havet li idé que it vell esser max bon ear sol. A altri homes on nequande posse fider se. E yo departet. Li long viage esset tre agreabil, e yo es tre joyosi esser ci. Céteri, omnes aclama mi bon Esperanto. » Red.

\* Ples vider li annotation, p. 37, nr. 2. de ti-ci numeró.



es grammaticalmen inreprochabil. E tamen li sense es comprensibil solmen per divination ; partli it resta completmen obscur. Or qualmen on posse far comprender a un hollandés (e to vale mutatis mutandis naturalmen por omni lingues) que expressiones quam « doorgaan, met het oog op..., op aan kunnen, meevallen etc. es idiotismes de queles li sense resta obscur, si ili es litteralmen traductet? Li caracterisation de un expression quam idiotisme resulta ya factli solmen de un comparativ confrontation del divers lingues. On ne mem posse criticar in Espo li traduction de paroles quam Nl. « uitstapje, zich voornemen, uitgave, opgeven » per « elpas\*eto, antaùpreni, eldono, surdoni », nam Zamenhof ha ci dat li mal exemple per formationes quam « eldoni, elrigardi etc. »

**Quo vale un grammatica reductet a 16 regules, si it es evident que 9/10 del materiale a aprender in omni lingues have necos a far con it ?** E quo resta tande del tant laudat facilitá de Esperanto relativmen al altri systemas ? Necos quam un amari ilusion. Ti facilitá mem retorna se contra li propri lingue, talmen que it ne es exagerat dir que **Occidental oferta pro su clar e transparent structura lingual plu mult avantagies quam Esperanto e ne vell devenir plu desfacil quam Esperanto, mem si ti systema vell reducer su grammatica a solmen 8 regules.**

Li grand desfacilitás in li aprension de un L. I. (índiferent ca to es Esperanto, Ido o Occidental) veni sempre del lingue matrin, precipue quande li aprensor ne conosse altri lingues. To da nos un preciosi indication por li elaboration de nor lexicos e manuales. Un lexico quel da solmen traductiones de isolat paroles vale necos ; it es mem plu mal quam null lexico, nam it provoca li erras vice impedir les. Noi deve cuidar que li traductiones mey sempre esser accompaniat de exemples queles ilustra li corect usation del paroles traductet in li contextu. Naturalmen tal lexicos, queles existe ja por national lingues va sempre esser plu custosi quam litt skeletic vocabulariums. Ma esque factli un cronometre quel custa Fr. 50.— es plu expensiv quam un horloj custant solmen Fr. 3.50 ma quel in revanche varia circa 30 minutes chascun die?

Por que un lingue international mey posser successar, it ne suface que it possede un grammatica reductet a su max simplic expression. Yo leet recentmen li annual raport del « British Esperanto Association ». To es un del max fort federationes esperantistic. Su annual budget es superiori a 1500 pounds. Li propaganda es modellicmen organisat. Li « Education and Propaganda secretary » Sr. M. C. Butler dat « demonstration lessons » coram plu quam 11.000 scoleros e instructores. On fat contactar Espo con plu quam 1000 altri persones in 40 special conferenties e durant li annus 1935-37 li total númer de scoleros hant recivet information pri Esperanto ha esset plu quam 50.000, durant



que samtemporli on vendit ca. 20.000 manuales. It existe adplu un curs per corespondentie quel mobilisa li plen labor de un special functionario assistet de pluri instructores. E quo es li resultate? Durant un annu, solmen 29 studiantes obtenet li diploma, li annual budget resultat in un deficit de ca. £ 230.— e li membrité del B.E.A. ha regresset per ca. 450 persones in comparison con li annu 1935. E to evenit, quam di li raport : « malgré li vast public interesse quel manifestat se por Esperanto durant li ultim annu in max diferent formes ! » On espera que li ho-annual Universal Esperanto-congress va atraer suficient interesse por compensar ti perde por li inregistration de nov membres e on cita li númere 500 quam minimum atinyend. Ma « tiun opinion kelkaj konsilantoj nomis « optimismas » kaj ec\* « absurda » !

Quande on considera ti factes objectivmen on ne posse defender se del impression que ci « alquicos ne es in ordine ». Noi garda nos transformar ti constatacion in un ocasion por facil mocada o triumf-criada. Ma li symptomas revelat es suficientmen seriosi por que it mey nos esser permisset questionar ca realmen li Esperantistes ne va finalmen esser fortiat serchar li cause de lor missuccess in li just direction ?

## DISCUSSION

### ESQUE COUTURAT O DE BEAUFONT ?

*de Erik Stenberg*

Quande Cosmoglotta ante un annu publicat li prova que li ver autor de Ido esset Couturat e ne De Beaufront, li munde interlinguistic reactet tre diversmen :

Li Esperantistes generalmen acceptet ti revelation quam exact e lor grand historian Aymonnier assertet que noi confirmat to quo il hat long presentit. Li president del Comité linguistic de IALA, sr prof. Debrunner, in un recent discours in Bern pri li historie del L. I. anc signalat nor rectification pri li origine de Ido.

In li camp del Idistes, quel logicmen es li max interessat pri li origine de lor lingue, li atitude esset curiosi : Un del revues, « Progreso » (nro 118) declarat que li revelation de Cosmoglotta ne es nov, e que hay null dubit pri que Couturat ha decisivmen influet De Beaufront. Ma li altri Ido-revue, « Center-Bladet », ne mem mentionat ti rectification per un sol parol ! In su ultim numeró (may 1938) it mem publica un lettre de prof. Weber in Lwow aludente li « fundament recivet de De Beaufront », sin rectificar ti assertion.

Noi prende li libertá questionar respectosimen nor idistic amicos : Si, secun ili, nor revelationes es superflú, **a qui ili do atribue finalmen li « autoreso » de lor lingue ?** Noi es curiosi saver it. Esque ili va mantener li fals tradition secun quel lor lingue es debit a De Beaufront, o esque ili va aconosser que li pravas dat in Cosmoglotta es exact ?



Si « Progreso » considera li duesim solution quam sol evident, it vell dever in prim converter su colego de « Center-Bladet », nam li veritá es un e ne duplic.

Interim noi posse solmen repetir al Idistes que De Beaufront ha inventet necos. Omnicos in Ido esset fat de Couturat, de A til Z.

Li abnegation de Couturat ha esset admirabil e vermen meritori. Tamen a un seriosi historiano it plu ne es permisset ignorar li veritá e cluder li oculos avant li evidentie.

## **ESPERANTO QUAM LINGUE INTERNATIONAL AUXILIARI**

(Document 125)

*Sovente on demanda de nos un complet synoptica pri nor objectiones contra Esperanto, li motives queles justifica nor propaganda por Occidental malgré li existentie e pretendet difusion de Esperanto. Por ti scope noi ha editet nor document 125 basat sur un studie de Edgar de Wahl (« Arguments against Esperanto »). Li textu elargat per mult exemples e quelc ulteriori argumentes existe ja editet o in manuscrit in lingues german, anglés e francés. Noi publica in secuent un version Occidental, recomandante a nor capabil propagatores traducter li textu in lor ulteriori lingues matrin. Por evitar miscomprensos noi accentua que li present document 125 ocupa se exclusivmen pri Esperanto sin exposir li avantajies de Occidental. In li traductiones national, li paroles in Occidental es caracterisat quam « paroles international » e proviset per traduction in lingue national u necessari.*  
*Red.*

Si li futur lingue international auxiliari deve esser adequat al postulates de omni dominias del civilisation del present epoca, su structura va dever esser conform e nullmen inferiori a ti de un altmen developat European cultur-lingue.

Pro to it deve, unesimli, contener li tresor del international nomenclatura acumulat in scientie, arte, tecnica, economie, industrie, comerie, politica etc.

Duesimli it deve esser facil a aprender, precis in expression, grammatica e pronunciation ; su alfabeto e grafism deve, secun possibilitá, esser ja familiari a tis queles deve usar it.

Li structura de un international auxiliari lingue va pro to esser max rational, practic e economic ye témpor e efortie, (rapidmen aprensi-bil), secun li proportion del utilisat elementes prendet ex existent paroles ja international, i. e. radicas, afixes etc. max international possibil, e bon-conosset metodes de parol-formation, e secun que it secue familiari formes de expression ; to combinat con li max alt atinyibil gradu de simplicitá, claritá e regularitá.

In quel gradu Esperanto satisfá ti conditiones?

Esperanto es li max old del supervivent lingues artificial ancor propagat; li camp de battalie del systemas de LI es covrit per plu quam 600 mort systemas minu fortunat. Li grammatica de Esperanto es regulari, ma it contene un quantité de defectes e desfacilitás trovabil ni mem in pluri lingues natural.



## Ortografie

Li paroles international es in majorité de origine latin. Esperanto da les un ortografie ne international-european ma polonés-tchecoslovac <sup>1</sup>, quel defigura les.

Esperanto contene special **litteres tegmentat** (consonantes con accentu circumflex) inexistente in altri lingues, e consequentli trovat solmen in un númer limitat de printerías <sup>2</sup>, citat del Esperantist Stojan in su « Bibliografio ». In plu, mult scri-machines ne have un circumflex separat ; in mult polygrafat Esp-scribes on trova li circumflex scrit per manu in li stencil. Ti special litteres es **c**\* (quam *tch* in « *tchec* »), **g**\* (quam *j* in « *horloj* »), **h**\* (quam *ch* german, scott e tchec, *j* hispan.) **j**\* (quam *g* in « *págin* »), **s**\* (quam *ch* in machine) e **u** con un demi-circul quel es pronunciat exactmen egal al *u* sin demi-circul. Li admisset auxiliari ortografie, quel substitue un **h** al circumflex, es sovente presc grotesc : p. ex. *ghirafo* (giraff), *chesi* (cessar), *hhaoso* (cáos), *hhemio* (chimie), *gheneralala* (general), *Hhinujo* (China), etc.

**Li litter c in** Esperanto es sempre pronunciat *ts*, mem ante consonantes e *a*, *o*, *u* ; p. ex. *colo* (tsolo) = inch. *placo* (platso) = piazza, *caro* (tsaro) = tasar, *pactribuno* (patstribuno) = tribuno de pace, *danckanto* (dantskanto) = canzon de dansa.

Li **accentuation** in Esperanto — sempre quam in polonés sur li preultim sillab — producte sovente un strangi pronunciation contrari al usus international e conosset necú in li munde ; it deforma egalmen paroles de origine latinic e germanic : *vetero* (G Wetter, A wheather) = tempe. *somero* (A Summer, G. Sommer) = estive, *junio* = junio. *iluzio* = ilusion, *notario* = notario. *radio* = radio, *familio* = familie, *sekretario* = secretario, *vilao* = villa, *firmao* = firma.

**Li extirpation de omni duplic consonantes** producte sovente un strangi aspect del paroles ; p. ex. *maso* (masse), *kasó* (casse), *kuro* (currida, ne cura), *turo* (turre), talmen que *turisto* in Espo ne significa turist, ma guardian de turre.

## Grammatica

In li majorité del lingues modern, e specialmen in anglés (quel in li instruction scolari es considerat quam max simplic lingue), li grammatica tende vers analytism. In contrast, ti de Esperanto es aglutinativ.

Esperanto conserva li **obligatori acusative**, finient per **-n** in omni substantives, adjectives e pronómines.

Li adjectives deve sempre acordar se al substantives in númer e casu, p. ex. :

<sup>1</sup> Ti e altri remarckas nullmen torna se contra li lingues polonés, tchec, slovac, queles have ortografies sin dúbit excellentmen adaptat al reproduction del specific slav sones e paroles.

<sup>2</sup> P. ex. li grand printería quel printa Cosmoglotta, ne possede les.



« *tiu malgranda domo* » = ti litt dom.

« *mi vidas ciujn tiujn malgrandaĵn domojn* » = yo vide omni ti litt domes.

Li signe del plurale in Esp es ne **-s** international, ma **-j** ; it sempre precede li **-n** del acusative. To es complicationes ínexistent in Anglés, Francés, Italian, Hispan, Portugalés, e li lingues Scandinav. Si on lee in Esperanto-gazettes li recensiones pri libres, on posse trovar li innumerabil plendes pri erras de acusative, ne solmen **-n** omisset in acusative, ma mem pri **-n** scrit u it ne deve star.

## Obligatori finales

Un ulteriori inútil ballast in Esperanto es li obligatori desinenties classificativ por li divers species de paroles, p. ex. **-o** por substantives, **-a** por adjectives, **-e** por un parte del adverbies (altres usa **-aŭ**). Ti finales da aspect abstrus a altrimen bon-conosset paroles, p. ex. *Eŭropo* (Europa), *Azio* (Asia), *Anglujo* (Anglia), *konstrua* (constructiv), *natura* (natural), *nacia* (national), *bela virino* (bell fémina).

In necun ligue del munde on trova alquicos analog ; e it es desfacil vider quel argument existe por li pretension que tal obligatori distinction per additional desinenties facilisa li studie o li usa del lingue. In altri láter, on save que it es tre desfacil docer a infantes german e dan distinyer inter li diferent partes del frases, quo es necessari pro li regul que omni substantives in German e Dan comensa per majuscules. E on posse dir securmen que mult anglés-parlantes rarmen es consciosi pri ca ili usa paroles quam *cut* e *dress* quam verbes o substantives, e paroles quam *faint*, *light* e *round* quam verbes, substantives o adjectives.

(Continuation in li número secuent.)

## EX ALTRI CAMPEs

— Ex li « Tutan korbon plenen de agrablajn surprizojn » quel nos presenta li nr. 971 (17.4. 38) de HEROLDO DE ESPERANTO yo desira reservar un mention special al fact que Esperanto ha conquestat li quinesim loc in un concurs arrangeat del Yugoslav jurnal POLITIKA. Durant un annu, ti jurnal hat publicat scrit curses de Francés, Anglés e German e pos lor finition li direction apertet un inquisition che li letores por selecter tri altri lingues. E Esperanto ocupat con 1200 votes li quinesim loc pos Italian (7035), Russ (6461), Tchec (4263) e Hispan (2918). Yo deve adjunter que li cifre 1200 es solmen suposit, nam ex li statistica del jurnal resulta solmen que li númere es plu quam 1000.

Ti resultate sembla bon, ma it vell har posset esser melior. Nam ti cifre de 1200 coresponde presc exactmen al numere del organisat Esperantistes Yugoslav. Or extra ili hay ancor (secun statistica aparit in nr. 59 de SUDA STELO) ca. 1500 Esperantistes ínorganisat. E tis evidentmen e regretabilmen sembla ne har fat lor deventie.



— In un ex su interessant rubricas « La kontraúuloj asertas... » (li adversarios aserte...) li redactor de ESPERANTO INTERNACIA (May 1938) combatte li idé que pro li inertie del munde, solmen un « miracul » vell posser far victoriar li L. I. Nam tal miracules vell, secun il, facilmen posser evenir.

Un mecen american o european vell por ex. posser decider investir « suficient » capitales in li propaganda de Espo, con li scope far un speculation mirobolant. O li Postal Union Universal vell posser ofertar un tarif preferential por printates e apertet communicationes esperantistic. O tri o quar micri states vell posser decider introducter Espo in lor reciproc relationes.

Pri li unesim punctu on ja ha fat experienties concludent. Tamen it vell forsan ne esser ínpossibil, trovar suficient capitales por far victoriar Espo. To es mem cert, si anc altri planetes extra li terra partiprende in li speculation. Ma esque it ne vell esser plu rational, consacrar li moné al difusion de Occidental ? Noi vell certmen atinyer un resultate ancor plu mirobolant con solmen 1 % del capitales necessari por Esperanto.

In omni casu, li idé pri li miracules es bon. Nam tam long quam on posse rasonabilmen esperar in un miracul, on ne besona considerar li afere quam perdit. Anc yo ha ja pluri vezes comprat biletes de loterie e yo do ne blama li Esperantistes. Ma on posse questionar se, pro quo li redactor ne ha pensat a un altri miracul, ad saver que Espo mey conquistar li munde automaticmen per su intrinsic qualitäts, queles es ya sempre tam fortmen trumpetat ! Ma to vell evidentmen ja esser un « ver » miracul, quel li redactor de E. I. self ne audacia rangear inter tis queles « posse facilmen evenir ».

— Li directores del grand bazar SELFRIDGE in London fat arangear un curs de Esperanto por su personale (Espo : dungitaro) in prevision del venient congress esperantistic in London. Ti curs vell har devet haver loc durant li laborhores. Li resultat del apell esset *consternant* por li direction, nam presc 300 employates declarat se pret, secuer li lecciones. Evidentmen on ne expectat — secun HEROLDO DE ESPERANTO — tam grand interesse por Espo e finalmen li direction selectet 30 candidates ex li interessates, nam por plu mult, it ne posset disposir li necessari témpor durant li laborhores. Por li altris on do arangeat un special curs exter li laborhores quel es nu secuet de 80 interessates. Granda sukceso ! Regretabilmen li interesse por un Esperanto-curs extra li laborhores hat evanescet che li 190 altris. *Scorpion.*

#### **Svissia have max mult jurnales**

Proportionat al númer de habitantes, max mult jurnales e revúes es editet in Svissia. Por chascun 3000 habitantes hay un jurnal, in Germania un jurnal solmen por 18.700 habitantes, in U.S.A. un por 61.000, in Grand-Britannia un por 177.000. Hay in Svissia 520 politic jurnales, 1080 special revúes, general revúes e revúes por families, 112 calendaries, 120 jurnales junt have und edition total de 1½ million de exemplares.



## NOI E I.A.L.A.

### *A nor concurrentes*

Li brochura « Some Criteria for an International Auxiliary Language and Commentary » publicat del association IALA, ja plurivez mentionat in Cosmoglotta, contenet cert ínclaritás in li criteries e cert erras e esperantophil unilateralitás in li comentarie, queles causat miscomprensas in li neutral publica, e instigat quelc adherentes de skematisant systemas de L. I. a un prematur exultation pri ínaptitá de Occidental.

Por parar ti efectes (e apart intentiones de adversari systemas) **ne** volet de IALA, IALA ha fat nos loyalmen li secuent declaration, quel noi reproductes con su consentiment in version Occidental. Noi remarca, que IALA, per invitar duvez representantes de Occidental a intim conferenties, e per declarar nos su bon volentie studiar nor detaliat, motivat replicas, ha pruvat que it vole vermen conosser nor vis-punctus e principies.

### **Li declaration de IALA**

*« Ex divers enunciationes de interlinguistes de diferent scoles in publicationes e lettres noi vide que ha nascet miscomprensas concernent nor brochura « Some Criteria for an International Language and Commentary » (1937).*

*Ti brochura ha esset dismisset a un grand númer de linguistic e interlinguistic colaboradores e consiliatores por que ili mey enunciar se pri it. Li « Committee for Agreement » intende deliberar li ricevot enunciationes in marte 1938.*

**Li Committee for Agreement e IALA in general havet nullmen li intention, excluder per li « Criteria » alqual scole del movement por li Lingue International de ulteriori consideration ; omni tal interpretationes del « Criteria » noi declara esser fals. Specialmen li comentarie del criteries ne es declarationes definitiv del C. f. A., ma solmen exemples por explicar li criteries ; propositiones por completar o changear les va esser acceptet voluntarimen. »**

Ti declaration esset nos comunicat per Prof. A. Debrunner, president del « Committee for Agreement » de IALA, ancor ante li conferentie in marte ; pro tecnic impedimentos noi posse publicar it solmen nu.

Pro motives de loyalitá e de tact noi ha evitat publicmen polemisar contra li scrite « Some Criteria... », tam long quam noi crede posser constatar veritabil volentie a intercomprension che li altri láter, e have direct deliberationes de organisation a organisation in seriosi intention arivar a reciproc comprension. Si un tal intercomprension ne es obtenibil, sempre ancor va restar nos li possibilitá, criticar e scientificmen refutar ci córam nor letores opiniones o metodes queles sembla nos defectiv.

I. F.



## LI REVELATIONES DEL SCRITURA

Li importantie del grafologie hodie plu ne es contestat. Directores, firmas, burós de professional orientation recurre plu e plu a su servicie por divinar li caracteres e li capabilitás del yun persones solicitant un oficie. Ja desde long on havet li idé penetrar in li mente del celebri persones analysante lor scriptura; e mult historianes e jurnalistes cuida completar biografies per grafologic analyses. It esset natural utilizar li servicies de ti nov scientie anc in li dominia interlinguistic e ante 6 annus (in 1932) li subsignate fat analysar li scripturas de pluri celebri interlinguistes. Li resultate de ti consultation esset publicat in li document 101 editet del Institute Occidental in Chapelle, ma sin li indication del nomines del analysates. Mult persones questionat nos pri li nomines o fat supositiones fals. Hodie, pos li publication de nor « Ver historie del lingue international » (Cg A 116) noi opine que li publication del « claves » del consultation grafologic va altmen interessar nor letores.

Vi li clave :

Interlinguist nro 1 = W. Ostwald, li scientist german.

Interlinguist nro 2 = L. de Beaufront.

Interlinguist nro 3 = Otto Jespersen.


Interlinguist nro 4 = Edgar de Wahl.

Interlinguist nro 5 = W. Stead, li publicist anglés mort sur li « Titanic ».

Pro que omni quin ha ludet un grand rol in li afere del Delegation in 1907, on nu va comprender mult coses in li historie del lingue international. Un cose mult frappat nos : quande noi submisset li lettres de L. de Beaufront e E. de Wahl al famosi grafologa Anne Osmont, illa strax declarat : *li duesim es tot diferent del unesim, mult plu « capabil » ; to es un chef, un ductor, ma ne li unesim.* It es a notar, que sra Osmont totalmen ne conosse li movement interlinguistic e su historie.

In ultra, it es facil verificar li diagnose de sra Osmont, consultante un altri seriosi grafolog. It vell anc esser interessant far examinar li scripturas de altri conosset interlinguistes quam Couturat, Zamenhof, Schleyer, B. de Courtenay, Sébert, de Saussure etc.

R. B.



E. de Wahl.



**Hiccada.** Tre desagreibil e anc risibil. Mult remedies es recomandat. P. ex.: detornar li attention del hiccanto; o terror le in alqual maniere; trincar aqua. Ma ti medies sovent es in van. Plu efectiv es: prender quelc sucre in un coclare de café, versar sur it quelc guttes de vinagre e inglotir li sucre. On posse anc glotir simplicmen sin haver alquicos in li bocca, do glotir solmen li saliva. Yo self ha experit quam maxim efectiv medie lu sequent: on side absolutmen tranquill in un foteul e respira tre profundmen (in e ex) e lentmen, plurvez; finalmen, quande li respirada ha devenit lentissim, e pos un profund ex-respiration, on stoppa respirar (quo tande es possibil ye un cert tēmpore); tande on va sentir qualmen li stimul a hiccar desaparir tra-infra li esofag til li stomac, ú it dissolue-se completmen.

**Cramp del sure (spasma).** Contra ti desagreibil, mem dolorosi male es recomandat ti simplic remedie suggestiv: on efortia levar li ped-fingres ad-supra; ne per li manu, ma per li simplic *volentie* levar li ped-fingres ad-supra. To suface por dissoluer li spasma del sure.

— It es un desfacil arte rasar se sin vulnerar su pelle; mem quande on usa un modern rasette. Por stoppar li sanguada, mult seniores usa acri medies. To ne es recomendabil. It es plu agreabil e plu bon por li pelle, prender simplicmen calent aqua. Per frigid aqua on ne posse stoppar li sanguada, ma per calid aqua. On merge un lavette in calid aqua e mette it sur li vulnerat parte del facie.

— Vu forjetta vor rasalamettes, quande illi ha devenit obtus? Vu posse usar les ancor quelcvezes per acutar les per li manu. Yes, per li manu! To ne es dangerousi, si vu ne es tro inhabil. Prende li lamette per li pollic e index del dextri manu, talmen que vu have li un rasa-linea platmen inter ti du fingres, e fa it glissar along li bord del levul manu, de supra a infra, de infra a supra, e talmen iterat circa 30 o 40 vezes. It comprende se: ne in li direction del cisent linea, ma verticalmen contra it, e vu deve prender li lamette fixmen inter pollic e index. Vu ya posse provar li cose tre caut in comensa.

— Un aspect tam compatibil quam risibil: un mann quel ha perdit su buton de collare; serchant it in van sub tables, stules, lettes, il commensa transpirar, li sangue ascende in su cap, e finalmen il es obsedet per un insensat furie...

Il mey prender un lantern de tasca e iluminar li suol; talmen il va trovar facilmen ti litt object quel ceta se con li malicie de un diabol...

Céterli il mey munir se per un stock de butones; alor il nequande va venir in un tal embarass.

— It es agreabil sternutar, si on have un nas-linette; it mey esser agreabil, sternutar du-vez, tri-vez... Ma quelcvez it eveni que li sternutada ne cessa, e tande li cose deveni desagreibil. Vi un medie cessar: on frota, per li puntas del fingres, li radica del nase, li region inter li broves; per to li stimul de sternutation es removet.

### **Tu ne deve adulterar!**

Ex New York on raporta un emoent tragedie: Li malad marita del avocat Henri Gray hat petit su bellissim yun sestra Bessie venir cuidar la. Inter belfratre e belsestra bentost nascet un passionat amore. Por possibilisar un secret rendevú, li yun flicca comprat un fort dormitive e dat it in vésper a su sestra in vice del usual medicament. Li sequent matin, quande illa intrat li chambre de su sestra, illa trovat la mort. Sin desfacilità Bessie divinat quo hat evenit, e ante que on posset impedir la, illa jettat se tra li fenestre e cadet mort. Li avocat confesset li horribil veritá al medico. Ma li medico rapidmen constatat que li dormitive esset completmen innocent e que li vive de sra Gray hat finit per un apoplexie previdet desde long pro su maladie... Un hor plu tard on aportat li avocat dement in li hospital de follos.



Ili es ínnumerabil hodie. Li unesim serie comemorativ esset emisset del States Unit de America in 1893, por comemorar li 4-ésim centenario del decovriton de America per Columbo. It consiste ex 16 marcas rectangulari (plu larg quam alt), considerat durant long témpor quam li mastricovre del filatelie. Li images representa li divers evenimentes del decovriton : Columbo vide li terra ; il debarca in Guanahani ; il es in li monaster de la Rabida ; il es incatenat ; il es acceptet in Barcelona ; il raconta pri su viages ; il presenta un gruppe de Indianos al reyessa Isabella ; un marca monstra su flotte, un altri li nave amiral « Santa Maria » ; li max alt valores, 4 e 5 dollars, es consacrat al reyessa e a Columbo self. Ti typic serie esset emisset sin alcun intention speculativ, it esset exclusivmen un homagie al passate, al mann coragiosi e energic. Li sam idé inspirat li marca unic de 25 cts. violett de Venezuela, emisset anc in 1893 : Columbo debarca ye li continent sud-american e planta un cruz lignin monumental sur li rive. Tre rapidmen li speculation acaparat un invention quel originarimen hat esset liber de interesse pecuniari : li marcas de 1893, editet in comensa in un rasonabil númer de exemplares, esset tam demandat que posteriorimen on grandmen augmentat li cifre de edition. In ti specie de marcas on videt un font de revenúes suplementari, sive por li administration postal self, sive por diferent comités besonant medies pecuniari. Desde tande on creat series special sin limite e, on presc posse dir : sin honta. Chascun anniversarie de alquant importantie devenit pretext por emission de nov series, sovente extra proportion al eveniment a comemorar ; hotémpor on emisse series special por celebrar li 350<sup>ésim</sup> anniversarie del nascentie de un heroe national o li 175<sup>ésim</sup> anniversarie del morte de un famosi scientist ; por signalar li importantie quel desde 50 annus ha atinyet un via de trafic, o li inauguration de un congress eucaristic o altri. Specialmen Italia ha editet tant series comemorativ, que li marcas comemorativ es plu numerosi quam li marcas emisset per li posta ordinari desde li foundation del Unitá Italian ; pro to on estima les poc, malgré lor íncontestabil bellitá. Un inquietant maladie de nor témpor es li emission de blocs comemorativ, vendit mult plu custosi quam li valore nóminal del marcas composient les ; to es un abus contra quel on ne posse protestar sat fortmen : lass nos mentionar ci li bloc nominat « Naba » in Svissia, li bloc del « Pexip » in Francia, emisset ye ocasion de divers Expositiones ; li ínnumerabil blocs del States Unit ye li 150-ésim anniversarie del creation del divers states formant ti lande, tis de Hispania in guerre contenen li portretes de politicos actual. On senti in to tam clarmen li beson procurar se moné per omnicunc medie, que li interesse filatelic quasi desapari ; tal series absolutmen ne es recomendabil. Tamen multes merite nor attention ; noi va signalar les a nor letores in nor proxim numeró.

C. V.



*J.-W. von Gæthe :*    **LI REY DEL ALNES**<sup>1</sup>

Qui cavalca in nocte tra vent siflant?  
 It es li patre con su infant.  
 In su brass il presse li litt garson,  
 Le tene calidmen, securmen e bon.  
 « Mi filio, quo fa te celar tu visage? »  
 — « Li rey del alnes con bell equipage.  
 Ne vide tu le? Con coron e manto! »  
 — « Yo vide un nebul, mi car infanto. »  
 — « Ples, bell infant, venir con me!  
 Bell ludes va yo luder con te;  
 Li rive splende con mani flores;  
 Mi matre se vesti in mult colores. »  
 — « Mi patre, mi patre, ne audi tu pian  
 Li bell promesses del rey aeran? »  
 — « Ples, resta quiet, mi car infant,  
 Sicc folies brui in vent susurrant! »  
 — « Ne vole venir tu, infanto car?  
 Mi filias amabil te va amusar.  
 Mi filias dansa li ronde noctal.  
 E va te lullar per canzones elfal! »  
 — « Mi patre, mi patre, ne vide tu ta  
 Li filias del rey in li obscuritá? »  
 — « Mi filio, mi filio, yo vide precis:  
 Old sálices sta con foliage gris! »  
 — « Yo ama te! Me charma tu bell tenentie!  
 E si tu ne vole, yo usa violentie! »  
 — « Mi patre, mi patre, il ha me tuchat!  
 Li rey del alnes dolor me ha fat! »  
 Li patre horre, cavalca rapid,  
 Tenente l'infanto gement e livid.  
 Atinye in fine con pena su cort.  
 In su brasses, li infant esset mort.

*(Trad. de Gilbert Pidoux e Ilmari Federn.)*

<sup>1</sup> « Erlkönig », verbalmen traductet « rey del alnes », es un fantoma habitant li locos humid e nebulosi proxim riveres, in li populari mytologie german e scandinav. In veritá li parol **Erlkönig** veni del sam origine quam li conosset parol italian **arlekin**, e, es quam ti ci, un inreconossibil personification del diábol. Li classic poema de Goethe representa li dialog inter li patre e li infant, e li paroles del fantoma, audit solmen del infant.



## Arvid Balk : LI VOCE DEL CONTINENTES

Ex un articul de Arvid Balk, correspondent in Ost Asia pri su viagie de Japan trans li Pacific, per Panamá in li Atlantic Ocean e til London.

Quo noi homes de hodie possede in li radio, to on remarca mult plu sur mar quam sur terra. Si on viagia semanes e semanes tra li infinit distanties, sin vider li minimal pezze de terra, sin incontrar un sol altri nave, tande on senti, quo es isolation del munde.

Ta nu sta ti polit magic bux. On torna un poc li buton. E ja on audi li continentes. On audi les parlar e cantar. Li continentes have su propri voces. It es admirabil escutar les.

Li voce de Asia secuet nos mult dies e noctes, pos quam li rivas de Japan ja long hat desaparit. Li voce de Asia clamat : guerre, guerre ! Li potent japanés radio-emissores de Tokio, Osaka e Nagasaki emisse politica, tónner de canones e li ferrin marcha de victoriosi armées. Li chinés emissores, subtenet del anglés antennes in Hongkong e Singapur, misset in li aer tot cascades de plendes e maleditiones. E nu venit anc li russes. Vladivostok e Khabarovsk, u li rubi marchal Blücher have su quarter general, tonnerat furiosmen contra li japaneses.

Ma grand amusement fat nos li russ radio per li voce de su anuncia-tora. Ti esset deliciosi. It esset suficent que illa caressat nos per su voce, e nor rud cordies fondet se. Nor « Chieffoff » (i. e. li prim oficero) nominat la « li rubi sirena », e al japanés « purser » (cassero) yo devet, quam unquande Odysseus, stuffar li oreles per cire. Altrimen on ne posset escartar le del aparate, talmen il hat inamorat se in li voce del vírgina distant ye 4000 milies, e del lingue de quel il ne comprendet ni un sol parol.

Adavan e adavan eat li nave al ost. Sempre plu debil devenit li voces de Asia. Li guerre silentiat detra li undmontes del Pacific. Li tónnere del canones de Nanking desaparit. Anc li voce del flicca de Khabarovsk venit solmen ancor quam un spira, talmen que li cassero posset forprender li cire ex su oreles. Profund silentie circumdat nos. Noi esset ínatinibíl por omni continentes, e plugat li gris undes de Kamtchatka e Alasca. Un glacial vent soflat del nordpol tra li sund de Bering. Li capitan regardat me trottant sur li deck vestit in peliss e lan, e dit : « In deci dies pos hodie vu va jacer in « shorts » e tropic camise sur li longstul e languir pri friscore ». Yo esset sat inept pariar con il ye un botel de whisky. Il ganyat it. Yo languit.

E subitmen li silentie cessat. Noi venit in li sfere del american emissores. Li radio comensat crepitar. Noi esset tre interessat pri li voce de America, pri quel noi promesset nos multcos. Ma noi esset horribilmen deceptet. Un bruida infernal lacerat nor oreles. Tri semanes noi esset li tormentat victimas de un rabie de jazz, foxtrott e diversissim niggersteps. Yo absolutmen ne es ínamic de dans-musica. Anc li acri



rytme del step-dances yo audi con plesura. Ma ne etern ! America ne have necos altri. Necos quam ti dances de matin til tard, interruptet solmen de comercial reclames. It es horribil. America have li max incultural radio, quel yo ha incontrat durant un viagie mundal durant tri annus. Noi viagiat de San Francisco along li costas de Mexico, Guatemala, Honduras, Nicaragua, Costa Rica e Panamá. Poy inter li westindian insules til li paralele de Florida. It esset sempre lu sam. Li tot aer esset plenat de ti nigger-dances, queles on ne posset evitar, proque dozenes de emissores lassat grelar les sur nos in un uragan-foy sin pauses. To esset do li voce de America, quel noi atendet con tant expectantie.

Noi respirat denove quande noi surtit de su sfere de action. E denove circumdat nos li grand silentie, ti vez in li centre del Atlantic.

Nu noi comensat fixar nor attention ye li voce de Europa. E it venit. It venit in comensa tot pian in un miraculosi concert de Beethoven fro London, secueta de un fuga de Bach fro Hamburg. Pos li american rugida de diábol un tam divin delicie, que it esset nos un profund eveniment. Ci parlat Europa. On audit li voce de su matre. It tuchat secret sentidas, evocat fantomas de nor infantie, avigilat mill reminiscenties. Li ardent desir extendet su ales. Quam feeric esset ti voce ! Europa have li max bell voce del munde, li voce del musica. Li nave esset ancor lontan exteriorli, in medie inter Africa e America, ma ja totalmen circumfluet de europian musica. Sur chascun radio-unde cantat violines de Mozart, jubilat canzones de Schubert, bruit oratories, sonat symfonies. Germanic, romanic, slavie musica junte se ye un europian concert, quel necú in li munde trova su egal. Quam ye un concurs de cantatores in Wartburg omni grand emissores de Anglia, Francia, Germania, Holland, Italia rivalisat in lor magnific musical presentationes. Con orgolie on sentit se quam europiano, e conceptet in li ovres del musical arte un del max profund e comun trates essential de europian cultura.

Por ti qui vive in Europa ti continente ne es un unité, sam quam Asia e America. Solmen quande on viagia super di oceanes e fro lontan distanties escuta li voces del continentes, on es tant alontanat del mill bruidas del omnidial vive, que on distinye lor lingue. Tande on audi clarmen : talmen parla Asia, talmen America, talmen Europa.

Si on ha audit li altri lingues, on aprende amar li lingue de Europa, e comprender su bellitá. Li musica de ti lingue es li porta de triumfe, per quel on intra con veneration in ti continent, sempre ancor max rich in cultura. Quo vell esser omni ti gigantic landes ta exterli con lor innumerabil popules sin Europa ? Chascun spiritual movement, del spira til uragan, chascun fecundant pensa, quel cultiva materiale e ideic terra virginal, sempre veni fro Europa, ti inexhaustibil rich loc de nascentie de spiritual vive e cultural impuls.



Malgré omni contradictiones e antagonismes lacerant Europa, támen li impetuosí lucta de ti continente pri mund-conceptiones e religiones, pri politica e filosofie, pri socialism e nationalism, pri economie e tecnica es li sol grand protagonist del munde.

To devenit me tre clar, quande noi aproximat nos al anglés Canal. It esset just li ultim soledí ante cristfesta, e li cloches del eclesies de Europa, li corales e sones de organ fluet in potent undes trans li atlantic ocean. E alor li emissores cessat, e in li solemni silentie elevat se fro Holland, solitari e potent, li voce de un predicant. Li parole de Deo planeat super li mare, circumfuriat de dúbit e crede de un homanité luctant pri veritá. Si Europa ne trova ti veritá, tande nequi va trovar it. Europa va trovar it ! Pri to on deveni convictet, si lontan in exteriore sur li mares on audi parlar li continentes.

(Trad. de E. W.)

---

## CRONICA

**Catalonia :** Noi receive nró 3, may 1938 de *Catalonia in Lucta*. Li purmen politic contenete impedi nos recenser it. Li revúe es gratuit. Interessates mey tornar se al redaction : Macià, 5, Figueres, Li revúe 8 págines in formate 22×26 cm. It es bon printat e li styl es passabilmen líber de idiotismes, do internationalmen comprensibil.

**Francia :** Ex special numeró del jurnal *Nouvel Age*, intitulat « Li Revolution cultural » (23. 4. 38, nró 361) redactet de *Régis Messac* yo extrae to quo secue : « Inter ti divers tentatives (de L. I.) mi personal preferentie es por un del max recentes : Occidental. It have sur Esperanto li imens avantagie har completmen eliminat li complicat e antiquat systema del casus e declinationes contra queles un spiritu modern nettmen rebelle. In plu su vocabularium es minu arbitrari quam ti de Esperanto e extraordinarimen facil a aprender. Ma Occidental self sin dúbit ne have un caracter definitiv. It es permisset creder, que in future on va ancote far melior ». In un ped-note il da mi adresse por ulteriori informationes. In nró 379 del 19 may sr Messac nota li furiosi reaction de quelc Esperantistes e li vacuitá de lor communicationes. Vi li fine de su articul intitulat : « Brevi observationes » : « Si pos eforties de 50 annus Esperanto ancor ne ha victet, esq le to ne secue ex defectes inherent al instrument self? It sembla me que por soluer dec sivmen ti question, hay solmen un medie : examinar li question del vispunctu tecnic, i.e. linguistic. Yo confesse que yo hesita far it, ne pro incompetence, nam mi studies e mi profession ha preparat me anc a entamar tal questiones ; ma pro que yo prevede que un tal debate vell esser long, enoyant e tre probabilmen steril. On vell macular mult columnes del *Nouvel Age* sin altri resultate quam enoyar mult letores e sin convicter li Esperantistes, queles, comprensibilmen, ne es necessimen linguistes. Tamen por que on ne mey acusar me fuir, e por limitar in sam témpor li damages, yo repeti li question quel yo ha posit — sempre sin success — a mult Esperantistes : Qualmen justifica vu in Esperanto li survientie del casus? Qualmen vu fa por vider in it altricos quam un complication inutil ? »

G. POUJET.

— Un old interlinguist Sr *Edouard Mauney*, ha morit subitmen li 21 april. Functionario del posta, il devenit ldist pos li mundal guerre e partiprendet li labores



del gruppe idistic in Paris. Sub li pseudonym Dayras, il creat in 1928, li revuette *Tolero*, experimental revue mundolinguistic, quel devenit in januar 1931 *Interlanguages* e aparit til august 1934. Sr Mauney, quel devenit malad e pensionat esset fortiat cessar li publication de su revuette. Per un strangi fate, ti mann, tre interessat pri li mundo-lingue, conosset null lingue, except su matrin e Ido. Probabilmen pro ti motive, il ne adheret a Occidental, benque il havet sempre tre amical relationes con nos. Mey ti devoet coidealist reposar in pace !

L. M. G.

**Italia :** Sr de Guesnet, President del Occ-Société de Francia, visitat li 16 aprile, Dr Prof. Alberto Picchi, ex-socio del Delegation, e fervid occidentalist, quel parlat le de su action por nor lingue.

— *Italia Filatelica* Nro 4, april 1938 consacra 8 págines a textus in e pri Occidental. Li politic caractere del majorité del textus impedi nos recenser les. Del vis-punctu typografic li revúe fa un impression excellent, clar printation sur bon paper. It es un nov propagandistic success de nor infatigabil pioneros Bevilacqua e Dr Dal Martello. Regretabilmen Dr Dal Martello malgré nor consilies sembla ancor ne har abandonat su infelici inclination alterar li pur lingue Occidental per dubitabil ingredienties de propri invention. Li multita de lingual impuritas, e de italianismes ne internationalmen comprensibil va gravmen impedir un favorabil acception del revúe che Occidentalistes extran favorisant li politic tendentie del revúe. Noi egalmen regreta dever signalar, que li revúe sin nor autorisation ha usat li nómin « Cosmoglotta », e que it reproducte divers textus de sr de Wahl e de APIS con modificationes ne aprobat del respectiv responsabil autores. Por evitar miscomprensiones noi constata que li Institute Occidental, responsabil administration de Cosmoglotta, e li Central Officie del Occidental-Union ne havet conossentie pri li contene de li revúe ante printation, e que sr de Wahl ha protestat che li redaction e administration contra li deformation de su textu e li confusion del nómines Occidental e Cosmoglotta. Anc li ton del interlinguistic discussion merite desaprobation. Insultationes ne es interlinguistic argumentes. Noi profundmen regreta que ancor ne omni coidealistes ha comprendet que noi Occidentalistes ne deve imitar li styl de cert ineducat Esperantistes.

Li interventiones de sr de Wahl e del Central Officie del Occidental-Union, e specialmen li excellent mediation de prof. Picchi e li comprendent atitude del chef-redactor Cav. Giuseppe Bevilacqua da plen esperantie, que li impressionant revúe va trovar un modo de redaction satisfant omni interessates.

F. L.

**Mexico.** Li grand jurnal *El Nacional* in su número del 14. may contene in su unesim págin un articul redactoral con titul in du grass lineas super 6 columnes : **Esperanto in decadentie. nu ascende Occidental.** Li articul da plen information pri li qualitas e scopes de nor lingue, in quelc detalies ili es antiquat ma li vivaci subtitules in american maniere e li humoristic presentation del materie largmen balancia to : *Li nov idioma es tam admirabilmen facil, que on posse leer it con un manu in li tasca...* — *Ti multiplicita (del lingues) desfacilisa li relationes comercial e scientic (e mem tis del amore, noi adjunte, nam « yo te amo » es un poc diferent de « I love you ». Ma, in fine...) Mersi a un lingue auxiliari — continua li foliette de propaganda — li munde va posser comprender unaltru. Probabilmen ; tamen, attention ! nam mem in li sam lingue li homes exchangea paroles queles fa rubi pro honte ! Ma, in fine...* — *E it mem es comprendet de persones queles ne ha aprendet it, suposit que ili have alcun education. It es clar, que cert jurnalistes del altri parti ne va posser comprender it...* E in ti styl on comenta nor argumentes. Un cordial mersi al inconosset humorosi autor !

---

**Abonnement a Cosmoglotta :** Fr. 4.— sviss ; Fr. 30.— francés ; RM 2.30 ; Kč 26.— ; 1 dollar ; 4 s. anglés ; Fr. 27.— belg ; fl. 1.70 ; dan Kr. 4.10 ; sved Kr. 3.60 ; L. it. 18.— ; 21 Esc. ; 13 respons-cupones.



# OCCIDENTAL-LITERATURA

* Editiones mimeografat.	Afrancat
<b>In anglés :</b> * RAXWORTHY A. S.: Introductory Grammar	SFr. 1 —
* Dr KEMP: Dictionarium Angles-Occidental (in preparation).	
* FEDERN - KEMP - HAISLUND: Occidental-English vocabulary	» 9 60
<b>In dan :</b> FEDERN-HAISLUND: Occidental-Dansk Ordbog	» 0 50
<b>In finn :</b> T. TATTARI: Occidental Kansainvälinen Kieli	» 1.50
<b>In francés :</b> L.-M. de GUESNET: L'Occidental (principes de la langue)	» 0 30
* Qu'est-ce que l'Occidental ?	» 0 30
* Aux Espérantistes	» 0 30
BERGER: L'Occidental en 5 leçons	» 0.40
» * Dictionnaire Français-Occidental, 316 p., en cahiers	» 5.—
» Solidement relié	» 9.80
» * Index Occidental-Français	» 0.50
» * Historiettes in Occidental (avec traduction française)	» 0.60
CHANAUD: Index Français-Occidental au Radicarium	» 0.80
<b>In german :</b> DIVERS AUTORES: « Occidental, die Weltsprache » 256 S. Leinen 4.50, Geh.	» 3 —
* BLASCHKE: Der Kampf um die Weltsprache	» 0.50
JANOTTA: Leitfaden der Weltsprache Occidental	» 1.—
OCCIDENTAL, Begründung, Grammatik, Wortbildung	» 0 50
GAR: Wörterbuch Deutsch-Occidental. Gebunden 5.30, Brosch	» 2 50
* Dr SCHRAG, Dr ASCHWANDEN, Dr NIDECKER: Die moderne Weltsprache	» 0 50
* Historiettes in Occidental (con trad. german)	» 0 60
FEDERN: Occidental-Grundlage für einen Internat. Terminol. Code	» 0.50
<b>In italian :</b> * J. RITTER: Curs de Occidental por Italianes	» 0.30
* Dr Ing. DAL MARTELLO: Corso in 3 lezioni per corrispondenza	» 0 60
* FEDERN-RITTER: Vocabolario Occidental-Italiano	» 0.30
<b>In hispan :</b> FEDERN-PEDRERO: Clave Occidental-Hispan (in preparation).	
CEBREIROS: Grammatica in hispan (in preparation).	
VARELA: Curs per correspondentie in 5 lecciones	» 0.50
<b>In portugals :</b> * Curs de Occidental	» 0.30
<b>In ruman :</b> ESCHENASY: Grammatica in ruman	» 0.60
ESCHENASY-HANT: Vocabularium Occidental-Ruman (in preparation).	
<b>In russ :</b> KOFMAN: Grand dictionarium russ-occidental (pret a printar).	
E. DE WAHL: Occidental por international relationes (clave 8 p.)	» 0.20
<b>In sved :</b> Dr C.-E. SJOSTEDT: Occidental de internationella ordens språk	» 0.40
Mag. phil. A.-Z. RAMSTEDT: Occidental, ett västerländskt kulturspråk	» 0 30
» Nyckel till Occidental	» 0 80
Dr B. BLOMÉ: Lärobok i Occidental, 72 p.	» 1 80
Dr C.-E. SJOSTEDT: Dubbel Occidental-ordbok, 98 p.	» 1 80
C.-W. von SYDOW: Occidental eller Esperanto	» 0 50
K. SEGERSTAHL: Hjälpsspråksfrågen	» 0.40
<b>In tchecoslovac :</b> O. MULTIS: Problem reci mezinárodní	» 0.50
J.-A. KAJŠ: Ucitel svetomluvy	» 0 50
J. PODOBSKY: Co je Occidental ?	» 0 20
KAJŠ-PODOBSKY-SVEC: Slovník Česko-Occidentalský	» 1.50
J.-A. KAJŠ: Occidental, moderné rec mezinár	» 1.—
* SVEC - PODOBSKY - FEDERN: Slovník Occidentalsko-Cesky	» 0.60
<b>Publicationes por esperantistes :</b> Occidental aŭ Esperanto	» 0.30
Vocabularium Esperanto-Occidental e Occidental-Esperanto	» 0.30
Esperanto als Welthilfssprache	» 0.20



	Afranca
<b>Publicaciones in Occidental</b> : AMICIS : Manuel Menendez (Ovre 6) .....	SFr. 0 60
BALMONT K. : U es mi hem ? (Ovre 2) .....	» 0 60
BERGER : <u>Curs de Occ. in Occ.</u> .....	» 0 50
» Historie del Lingue international (Cosm. nr. 116) .....	» 0.50
CORDONNIER : <u>Original stenografie de Occidental</u> .....	» 1 40
* CREUX : <u>Stenografie Duployé por Occidental</u> .....	» 1.—
* » <u>Rythmica in Occidental</u> .....	» 0 60
* CREUX e BERGER : Li origines de Occidental .....	» 0 80
DIVERS AUTORES : Crestomatie de Occidental .....	» 1.50
* FEDERN Ilmari : Lexico Occ.-Occ (in preparation) .....	» 6 50
De GUESNET : Manuale de conversation .....	» 0.40
GUILBERT-DEMINGER : Vocabularium Occ.- F.A.G. (por li tomes 1-6 de Ovre) ...	» 0 75
* HEINI : Li via al prosperità .....	» 0 50
* Ing. HOERBIGER : Quo Occ. presenta al german ingeniero .....	» 0 50
* Ing. JANOTTA : Construction de un terminologic code .....	» 0 30
JANOTTA : Julius Lott, precursor de Occidental .....	» 1 20
* LITTLEWOOD : Vers un lingual instruction plu rational .....	» 0.50
MASARYK : Democratie e Humanità (Ovre 5) .....	» 0.45
PIGAL : Essentie de Occidental (Cosmoglotta Nr. 56) .....	» 0.50
PODOBSKY J. : Li astres del Verne (original poemas) .....	» 0.80
POE : Un descense in Maelstrom (Ovre 4) .....	» 0.60
R. ROLLAND : Europa e Asia, con vocabularium (Ovre 1) .....	» 0.60
TAKUR : Nationalism in Occidente .....	» 1.10
E. de WAHL : Radicarium directiv in 8 lingues .....	» 2.50
» Spiritu de Occidental, 128 p. ....	» 2.—
Ancian collectiones de Cosmoglotta. Secun li annus .....	de fr. 2.— a » 15 —
Ancian collectiones de Helvetia, per annu .....	» 2 —
<b>Divers</b> : SKÖLD-PODOBSKY : Tri canzones. Du canzones (por un voce e piano) chascun	» 1.50
Prospecte in Occidental por adjunter in lettres, 10 ex. gratuit ; chascun in plu .....	» * 0.03
Covertes, postcartes con propaganda-textu, 100 ex. ....	» 1.50
Marcas glutinabil, 100 ex. ....	» 1.—
Insigne .....	» 1.50
Omni ti libes es recibibil de : Institute Occidental, CHAPELLE (Vd), Postchec-contos : Lausanne	
II.1969 ; Berlin 1683 36 ; Bruxelles 3504 45 ; Copenhag 269 72 ; Paris 1765 46 ; Stockholm 74 395.	

## COSMOGLOTTA

**CONDITIONES DE ABONNAMENT.** Li precie de un simplic abbonament es li correspondent valore de Fr. 4.— sviss o 13 respons-cupones. Ti quel misse Fr. 7.— sviss receive 3 exemplares (abbonament de propaganda). Li precie del abbonament in li moné del divers landes es indicat sur li ultim pagine de chascun numero. — Li abbonament a Cosm. es annual, departe del 1-esim de chascun mensu e continua til li scrit revocation del abbonate. On posse inviar li abbonament al secuent adresses :

ANGLIA : H. D. Akerman, 12 Ollerton Road, New Southgate LONDON, N 11.

Leonard Beer, 40 St. Rule St., LONDON, S. W. 8

AUSTRIA : Occidental Club Progress, Ing. A. Reichert, Hebragasse 9, WIEN IX. (pch. Wien B 29 460)

BELGIA : Institute Occidental, CHAPELLE (Vd), Svissia (Pch. Bruxelles-Brussel 3504.45).

CUBA : Bonneval e Fuentes, Arguelles 204, CIENFUEGOS.

DANIA : Institute Occidental (Vd), Svissia (pch. Köbenhavn 269 72).

ESTONIA : Kosmoglott, Eha 10, TALLINN.

FINNLAND : J. H. Haukkaupuro, Steniuksen tie 15, HAAGA.

FRANCIA : L.-M. de Guesnet, 83, Rue Rochechouart, Paris 9 (pch. Paris 26437).

Institute Occidental, CHAPELLE (Vaud), Svissia (Pch. Paris 1765 46).

GERMANIA : Occidental-Buro, CHAPELLE (Vd), Svissia (Pch. Berlin 1683 36).

HISPANIA : C. Varela, Macia 5, FIGUERES (Cat.).

ITALIA : Dr Ing. E. Dal Martello, GRISIGNANO di Zocco VICENZA.

NEDERLAND : H. Littlewood, v. Panhuysstr. 18 A., GRONINGEN.

PORTUGAL : R. de Beça e Melo, Av. Sac. Cabral 56, PENAFIEL.

RUMANIA : Aurel Eschenasy, Calea Brestei 27, CRAIOVA.

TCHECOSLOVAKIA : Jos. Svec, Skroupova 2, PRAHA VII (Pch. Praha, Nr. 9.438).

SVEDIA : Sved Occidental Federation, Box 171, STOCKHOLM (pch. Stockholm 70 315).

Institute Occidental, CHAPELLE (Vd), Svissia (pch. Stockholm 74395).

SVISSIA e altri landes : Institute Occidental, CHAPELLE (Vd), (pch. II. 1969).

U. S. A. : M. K. Gardner, 803 State Street, MADISON (Wis.)